

# SPR sedia hadapi kemungkinan

UM - 8 FEB 2003

KUALA LUMPUR 7 Feb. — Suruhanjaya Pilihan Raya (SPR) bersiap sedia untuk menghadapi kemungkinan pilihan raya umum ke-11 diadakan serentak dengan Sabah walaupun mandat untuk negeri tersebut berakhir pada April tahun depan.

Setiausaha SPR, Datuk Wan Ahmad Wan Omar berkata, untuk itu pihaknya telah mengaktifkan Jawatankuasa Teknikal sejak awal tahun ini untuk menyediakan pegawai dan petugas yang mencukupi, kelengkapan pusat dan peti mengundi serta logistik.

SPR juga katanya menyediakan peruntukan yang lebih besar bagi pilihan raya umum akan datang berikutan pertambahan kerusi Dewan Undangan Negeri (DUN) dan Parlimen selepas proses persempadanan semula.

"Walaupun hak untuk menentukan pilihan raya DUN Sabah adalah bidang kuasa

kerajaan negeri, SPR telah bersiap sedia sekiranya pilihan raya umum diadakan secara serentak melibatkan negeri itu," katanya kepada *Utusan Malaysia* hari ini.

Beliau menyatakan demikian ketika diminta mengulas kenyataan Perdana Menteri, Datuk Seri Dr. Mahathir Mohamad kelmarin yang menolak spekulasi pilihan raya umum akan diadakan sebelum beliau meletakkan jawatan pada Oktober ini.

Sebaliknya Dr. Mahathir menegaskan, tarikh pilihan raya umum akan diputuskan oleh pengganti beliau, Datuk Seri Abdullah Ahmad Badawi.

Mengulas lanjut Wan Ahmad berkata, proses persempadanan semula kawasan pilihan raya yang dilakukan oleh SPR tahun lalu menyebabkan berlaku pertambahan 25 kerusi Parlimen dan 63 DUN di seluruh negara.

Justeru katanya, ini menyebabkan peruntukan yang perlu disediakan juga mengalami pertambahan yang besar termasuk untuk penyediaan pusat dan peti mengundi dan logistik.

"Bagi negeri Sabah kemungkinan kita perlu menambah bilangan helikopter yang akan digunakan semasa pilihan raya.

"Malah sebenarnya setiap kali pilihan raya umum budget akan bertambah apatah lagi apabila diadakan persempadanan semula," ujarnya.

Sementara itu beliau berkata, keputusan SPR tidak membenarkan mana-mana pemilih yang mendaftar tiga bulan sebelum Parlimen dibubar tidak boleh dicabar di mahkamah.

Berdasarkan perangkaan SPR, setakat hari ini kira-kira 1.7 juta warganegara Malaysia berumur 21 tahun masih belum

## pilihan raya ke-11 serentak

menggunakan kemudahan Sistem Pendaftaran Pemilih Sepanjang Tahun (SPPST) yang diperkenalkan Julai lalu.

Wan Ahmad berkata, peraturan baru itu adalah sah di sisi undang-undang berdasarkan Akta Pilihan Raya 2002, Peraturan-Peraturan Pilihan Raya (Pendaftaran Pemilih) 2002.

"Mengikut undang-undang itu, setiap nama pemilih perlu melalui proses pameran bagi membolehkan sebarang bantahan dibuat sebelum ia dapat disahkan oleh SPR dan kemudiannya diwartakan," ujarnya.

Ini katanya, penting bagi membolehkan penduduk di kawasan mengundi mengenal pasti jika terdapat nama pemilih yang tidak wujud di kawasan tersebut atau wujudnya penyalahgunaan kad pengenalan atau aktiviti pemindahan pengundi.

"Ini adalah satu proses *check and balance*

bagi mewujudkan keadilan dan tidak ada sebarang penyelewengan dalam daftar pemilih," katanya.

Beliau menambah, proses mewartakan daftar pemilih dibuat setiap suku tahun dan jika nama pemilih tidak sempat dipamerkan, SPR tidak boleh membuat pengesahan sekali gus menyebabkannya tidak layak mengundi.

Pada masa ini katanya, SPR sedang menjalankan proses untuk mengesahkan pemilih yang mendaftar sepanjang November tahun lalu hingga bulan lepas sebelum dapat diwartakan pada bulan ini.

"Pendaftaran baru sedang dibuka sehingga 31 Mac depan dan akan diwartakan selewat-lewatnya April depan, begitulah seterusnya sehingga nama pemilih diletakkan dalam daftar pemilih induk pada awal tahun depan," katanya.